

Cam. c. 820. 22<sub>N</sub>

Lucasian Professorship.

—  
DEED OF FOUNDATION

AND

GRANT

OF

KING CHARLES II.

UNIVERSITY  
LIBRARY  
CAMBRIDGE

## DEED OF FOUNDATION.

---

OMNIBUS Christi fidelibus ad quos hoc presens scriptum pervenerit ROBERTUS RAWORTH de Grayes Inn in Comitatu Middlesexiæ Armiger et THOMAS BUCK de Cantabrigiâ in comitatu Cantabrigiæ Armiger, Executores ultimi Testamenti dignissimi Viri, HENRICI LUCAS de London Armigeri, nuper defuncti, Salutem in Domino Sempiternam. Sciatis, quod cum prædictus venerabilis et consultus vir Henricus Lucas Armiger ex propenso suo in Academiam Cantabrigiensem, et in rem literariam affectu a præfatis Roberto Raworth, et Thomâ Buck, Executoribus suis, terras comparari ad valorem centum librarum annuatim supremo testamento mandaverit, in annum Professoris, seu Lectoris Mathematicarum Scientiarum in dictâ Academiâ stipendium vel salarium perpetuò cessuras, sub ejusmodi constitutionibus et regulis, quas Executores sui, adhibito Procancellarii et Præfectorum Collegiis dictæ Academiæ consilio, tam honori magui istius corporis, quam hujusce literaturæ, omni hæctenus præmio destitutæ, incremento ac promotioni judicaverint summopere accommodatas; Nos prædicti Executores, pro ratione fidei nobis commissæ de exequendâ præclari Benefactoris voluntate solliciti, rogato prius et impetrato dictorum Procancellarii et Præfectorum consilio, habitoque ad id consilium præcipuo respectu, ordinationes infra scriptas, promovendis istis studiis Mathematicis, uti arbitramur,

apprimè conducentes, approbamus, omniq̄ue per dictum Henrici Lucas testamentum nobis concessâ autoritate ratas volumus et declaramus.

Itaque statuimus imprimis et ordinamus, quod perpetuis futuris temporibus quicquid annui redditus (deductis necessariis expensis) ex prænotatis terris ad usum prædictum acquisitis vel acquirendis quâcunq̄ue justâ ratione accreverit, id integrè cedet in subsidium et præmium Professoris Mathematici, modo infra dicendo, et sub conditionibus mox exprimendis electi, et constituti.

Quod officium attinet dicti Professoris Mathematici, ut horum studiorum, quâ publicè, quâ privatim, excolendorum ratio habeatur, volumus et statuimus ut dictus Professor teneatur singulis intra uniuscujusque termini Academici spatium septimanis semel ad minus aliquam Geometricæ, Arithmeticæ, Astronomiæ, Geographiæ, Opticæ, Staticæ, aut alterius alicujus Mathematicæ disciplinæ partem (pro suo arbitratu, nisi aliter expedire Procancellario visum fuerit) per unius circiter horæ spatium legere atque exponere, loco et tempore a Procancellario assignandi, sub poenâ quadraginta solidorum pro singulâ lectione omissâ, ex stipendio ipsi debito per Procancellarium subtrahendorum, et Bibliothecæ Academicæ, pro coëmendis libris, vel instrumentis Mathematicis, applicandorum; nisi ex gravi corporis infirmitate officio suo satisfacere non poterit. Tamen excusationem nolumus ultra tres septimanas valere, ut nisi elapsis tribus septimanis alium substituât idoneum Lectorem, Procancellarij judicio approbandum, sciat sibi pro quâlibet lectione prætermisâ viginti solidos de stipendio suo per Procancellarium subtrahendos, et usui prædicto applicandos. Quò autem dictus Professor ad munus hoc legendi non perfunctoriè præstandum efficacius astringatur, præstiti fideliter ab ipso officij certius extet indicium, et studiorum præsentium fructus quadantenus etiam ad posteros servetur, statuimus ut dictus Professor semel

quotannis, proximè ante festum Sancti Michaelis non pauciorum quam decem ex illis quas præcedente anno publicè habuerit, Lectionum exemplaria nitidè descripta Procancellario exhibeat, in publicis Academiae archivis servanda; quod si ante tempus præscriptum facere neglexerit, eo usque careat stipendio suo, donec officium det, et quanta fuerit rata portio temporis postea elapsi, usque dum id perfecerit, tantam Redditûs sui vel salarii annui partem Procancellario teneatur exsolvere, Bibliothecæ Academicæ ad usus prædictos applicandam. Quinetiam decernimus, ut dictus Professor teneatur duobus per singulas cujusque termini hebdomadas a Procancellario præstituendis diebus, unoque extra terminum die, quando-cunque dictus Professor in Academiâ præsens fuerit, per duas horas itidem præfigendas omnibus illum consulturis vacare, liberum adeuntibus, aperto cubiculo accessum præbere, circa propositas ipsi quæstiones, et difficultates haud gravatè respondere; in eum finem globos et alia idonea instrumenta Mathematica penes se in promptu habere. Inque omnibus ad illud propositum spectantibus studiosorum pro suâ virili conatus adjuvare: quorum aliquod si ultro neglexerit, corripiatur a Procancellario, et si de neglecto officio sæpius admonitus neququam se emendaverit, pœnam incurrat intolerabilis negligentiae ulterius decretam.

Porrò ut horum observatio fortius muniatur, et ne quis ex dicti Professoris absentiam oboriatur neglectus, statuimus ne dictus Professor intra præfinita terminorum intervalla Academiâ excedat, aut alibi extra Academiam per sex dies continuos moretur, nisi gravissimâ de causâ per Procancellarium approbandâ, idque petitâ prius et impetratâ a Procancellario veniâ: sin fecerit secus, quanta fuerit rata portio temporis ab egressu suo præterlapsi, tantâ salarii sui parte penitus excidat. Quod si forte diutiôr ab Academiâ absentiae, quæ dimidiû termini spatium excedat, causa acciderit necessaria, Procancellarii,

et duorum (qui Collegiorum Præfecti fuerint) seniorum Doctorum judicio approbata, aliquem interea idoneum substituat, qui suo loco legat, et reliquis muniis fungatur modo supradicto, et sub pœnâ consimili.

Quinimò pari causâ, ne dictus Professor ab officii sui debitâ executione distrahatur, nolumus omnino et prohibemus, ut is ulla quâvis Ecclesiasticâ promotione gaudeat, quæ animarum sibi curam adnexam habeat, aut residentiam exigat hisce statutis adversantem; sub pœnâ amissionis, ipso facto, omnis Juris, quod in hac sua professione prætere valedat.

Quoad personam vero et qualitatem Mathematici Professoris, volumus et injungimus, ut qui huic provinciæ admovetur, sit vir bonæ famæ, et conversationis honestæ, ad minimum Magister Artium, probè eruditus, et Mathematicorum præsertim scientiarum peritiâ instructus. Ejus autem nominandi, et eligendi jus ac potestas esto penes nos prædictos Executores venerabilis viri Henrici Lucas, durante nostrâ utriusque vitâ, aut uno supremum diem obeunte, penes alterum e nobis, qui in vitâ superstes permanserit. Postea vero perpetuis futuris temporibus ejus eligendi plena potestas sit penes Procancellarium, et Præfectos omnium Collegiorum dictæ Academiae, vel illam partem Præfactorum, qui electioni interfuerint, et peragatur tunc electio in hunc modum. Postquam Mathematici Professoris locum quâcunque ex causâ vacare contigerit, Procancellario incumbet quam cito fieri poterit, schedulâ scholarum publicarum ostio per octo dies continuos affixâ, cum de dictâ vacatione, tum de tempore ad futuram electionem destinato significare (tempus autem electionis ultra trigesimum a primâ significatione diem extrahi nolumus) quo tempore dicti electores publicis in scholis in unum congregati juramento semetipsos obstringant, seposito omni privato respectu, affectuque sinistro, se nominaturos, et suo comprobaturos suffragio quem, conscientia teste, ex petitoribus, (vel ex iis qui ab

electorum quolibet nominantur) maximè secundum prænotatas qualitates idoneum censuerint ad id munus obeundum; is vero, in quem plura suffragia conspiraverint, pro electo habeatur: quod si duobus forte vel pluribus paria obvenerint suffragia, Procancellario jus erit unum ex illis, qui aliis (si quando id contigerit) plura et inter se paria suffragia obtinuerint, pro suo arbitrio eligendi. Electus autem proximo opportuno tempore admittatur a Procancellario, præstito ante admissionum juramento se munus Professoris Mathematici a dignissimo viro Henrico Lucas in hæc Academiâ institutum juxta ordinationes et Statuta officium suum concernentia, pro suo posse fideliter executurum. Denique, quo prædictus Professor intra debitos honestatis atque modestiæ limites contineatur, neque de ullâ criminum ultro admissorum impunitate præsumat, statuimus ac decernimus, ut si dictus Professor convictus fuerit vel propriâ confessione, vel per testes idoneos, vel per evidentiam facti de crimine aliquo graviore (puta de læsâ Majestate, hæresi, schismate, homicidio voluntario, furto notabili, adulterio, fornicatione, perjurio) vel si intolerabiliter negligens fuerit, neque pœnis superius expressis poterit emendari, per Procancellarium, et Collegiorum Præfectos (vel majorem eorum partem) a suâ amoveatur Professione, sine spe regrediendi, aut commodum aliquod ulterius percipiendi. Quod si senio, morbo diuturno, aut incurabili impotentiâ, seu debilitate corporis vel animi fractus, suæ Professioni (modo et formâ prædictis) perficiendæ non suffecerit, abrogetur ei Professio per Procancellarium et dictos Præfectos (vel majorum eorum partem) hoc tantum adhibito moderamine, ut illi (sic a Professionis munere non suâ culpâ dimisso) si tempore Professionis suæ laudabiliter se gesserit, neque aliàs ipse de proprio ad valorem centum librarum annuatim provisum fuerit, tertia pars stipendii remaneat usque ad mortem suam; reliquis partibus successor sit tantisper contentus, integrum post ejus mortem

percepturus. In cujus rei testimonium nos præfati Robertus Raworth et Thomas Buck sigilla nostra præsentibus apposuimus. Dat. 19 die Decembris Anno Regni Domini nostri Caroli Secundi Dei gratiâ Angliæ, Scotiæ, Franciæ, et Hiberniæ, Regis, Fidei Defensoris &c. decimo quinto, Annoque Domini 1663.

## GRANT OF KING CHARLES II.

---

CAROLUS Secundus Dei gratiâ Angliæ, Scotiæ, Franciæ, et Hiberniæ Rex, Fidei Defensor &c. Omnibus et singulis has literas visuris-salutem. Cùm per dilectos nostros ROBERTUM RAWORTH, et THOMAM BUCK Armigeros Executores ultimæ voluntatis consulti viri HENRICI LUCAS Armigeri nuper defuncti innotuerit nobis dictum HENRICUM LUCAS in rei literariæ beneficium Professoris Mathematici munus in Academia nostra Cantabrigiensi instituisse; nec non dictis iisdem Executoribus suis, adhibito Procancellarij et Præfactorum Collegij dictæ Academiæ consilio, quæ ad dicti muneris commodam constitutionem, ac executionem debitam sibi ex usu viderentur, ordinandi curam commendasse: Et cùm dicti executores pro ratione fidei sibi commissæ, rogato prius et impetrato prædictorum Procancellarij, et Præfactorum consilio, ordinationes quasdam fecerint eò conducentes, quas à nobis suppliciter oraverint autoritate nostra regiâ stabilitas iri et ratificatas. Item cùm dicti Executores de prædicto munere ulterius bene mereri studentes, juxta consilium prædictorum, Procancellarij et Præfactorum, per sanctionem quoque nostram Regiant dicti Professoris lectionibus publice habendis certos ex Academicis auditores assignari; ab Electoribus dicti Professoris et ab Electo Professore juramentum exigendi potestatem fieri; dicto Professori, si Collegij cujusvis



socius fuerit, sodalitii sui unà cum dicto Professoris loco retinendi privilegium indulgeri; et si ante susceptum hoc munus socius non fuerit, ut postea in socium eligi possit, facultatem concedi; eundemque demum Professorem à muneribus quibusdam publicis obeundis eximi ac prohiberi à nobis itidem supplices efflagitaverint; Nos dictæ Academiæ commodo juxta ac studiorum profectui consultum cupientes, dictorumque votis Executorum benignè annuentes, imprimis ordinationes istas à prædictis Executoribus confectas Regiâ nostrâ potestate sancimus, et confirmamus, iisque omnibus et singulis plenum obsequium deberi atque præstari volumus et mandamus. Item lectionum, quas secundum ordinationes prædictas Professor Mathematicus habere tenetur, auditores esse volumus non-graduatos omnes post annum secundum, et Artium Baccalaureos omnes usque ad annum tertium sub eadem pœna, cui per statuta Academica obnoxii sunt à reliquis publicis Lecturis absentes. Quinetiam Procancellario potestatem impertimus juramentum exigendi et administrandi tam illis, qui per dictas ordinationes eligendi jus obtinent, quàm Professori electo et mox admittendo, juxta sensus in dictis ordinationibus expressos, atque præscriptos. Porro volumus et statuimus, ut dictus Professor eligi possit in socium cujusvis collegii non vetante professione suâ; et nè is sodalitis suo, si quod ante susceptum hoc munus obtinuit, aut postea obtinebit, vel ullis sodalitii sui emolumentis aut privilegiis eo tantùm nomine, seu causâ privetur, quovis cujuscunque collegii statuto non obstante. Volumus denique et prohibemus, ut prædictus Professor Decani, Thesaurarii, Seneschalli, aut Lectoris cujusvis in suo collegio munus capessat, aut ut inibi Tutorem se gerat (nisi Nobilium fortè vel generosorum sociis commensalium) vel ut Procuratoris, Taxatoris, aut alterius cujuslibet lectoris publicum in Academia officium sustineat, sub pœna amissionis ipso facto omnis juris, quod in hac suâ professione prætere

valeat. Quapropter et dictum Professore[m] ab omnibus et singulis muneribus istis prædictis liberatum volumus et exemptum. In cujus rei testimonium has literas nostras fieri fecimus patentes. Teste meipso apud Westmonasterium decimo octavo die Januarii, Anno regni nostri decimo quinto.

Per breve de privato sigillo,

HASTINGS.

